

四庫全書

史部

欽定四庫全書

宋史卷二百四十二

元中書右丞相總裁托克托等修

列傳第一

后妃上

太祖母昭憲杜太后

太祖孝惠賀皇后

孝明王皇后

孝章宋皇后

太宗淑德尹皇后

懿德符皇后

明德李皇后

元德李皇后

真宗章懷潘皇后

章穆郭皇后

章獻明肅劉皇后

李宸妃

楊淑妃

沈貴妃

仁宗郭皇后

慈聖光獻曹皇后

張貴妃

苗貴妃

周貴妃

楊德妃

馮賢妃

英宗宣仁聖烈高皇后

周人尊祖之詩曰厥初生民時維姜嫄蓋推本后稷之所自出以為王跡之所由基也宋之興雖由先世積累然至宣祖功業始大昭憲杜后實生太祖太宗內助之賢母範之正蓋有以開宋世之基業者焉觀其訓太祖以無逸治天下至於豫定太宗神器之傳為宗社慮蓋益遠矣厥後慈聖光獻曹后擁佑兩朝宣仁聖烈高后

垂簾聽政而有元祐之治南渡而后若高宗之以母道
事隆祐孝宗奉明慈怡愉之樂皆足以為百王法程宋
三百餘年外無漢王氏之患內無唐武韋之禍豈不卓
然而可尚哉昭憲垂裕之功至是茂矣舊史稱昭憲性
嚴毅有禮法易之家人上九曰有孚威如終吉其是之
謂歟作后妃傳

太祖母昭憲杜太后定州安喜人也父爽贈太師母范
氏生五子三女太后居長既笄歸於宣祖治家嚴毅有

禮法生邕王光濟太祖太宗秦王廷美夔王光贊燕國
陳國二長公主周顯德中太祖為定國軍節度使封南
陽郡太夫人及太祖自陳橋還京師人走報太后曰點
檢已作天子太后曰吾兒素有大志今果然太祖即位
尊為皇太后太祖拜太后於堂上衆皆賀太后愀然不
樂左右進曰臣聞母以子貴今子為天子胡為不樂太
后曰吾聞為君難天子置身兆庶之上若治得其道則
此位可尊苟或失馭求為匹夫不可得是吾所以憂也

太祖再拜曰謹受教建隆二年太后不豫太祖侍藥餌
不離左右疾亟召趙普入受遺命太后因問太祖曰汝
知所以得天下乎太祖鳴噎不能對太后固問之太祖
曰臣所以得天下者皆祖考及太后之積慶也太后曰
不然正由周世宗使幼兒主天下耳使周氏有長君天
下豈為汝有乎汝百歲後當傳位於汝弟四海至廣萬
幾至衆能立長君社稷之福也太祖頓首泣曰敢不如
教太后顧謂趙普曰爾同記吾言不可違也命普於榻

前為約誓書普於紙尾書臣普書藏之金匱命謹密宮人掌之太后崩於滋德殿年六十謚曰明憲葬安陵神主祔享太廟乾德二年更謚昭憲合祔安陵

太祖孝惠賀皇后開封人右千牛衛率府率景思長女也性溫柔恭順動以禮法景思常為軍校與宣祖同居護聖營晉開運初宣祖為太祖聘焉周顯德三年太祖為定國軍節度使封會稽郡夫人生秦國晉國二公主魏王德昭五年寢疾薨年三十建隆三年四月詔追冊

為皇后乾德二年三月有司上謚曰孝惠四月葬安陵
西北神主享於別廟神宗時與孝章淑德章懷並祔太
廟

孝明王皇后邠州新平人彰德軍節度饒第三女孝惠
崩周顯德五年太祖為殿前都點檢聘后為繼室后恭
勤不懈仁慈御下周世宗賜冠帔封琅邪郡夫人太祖
即位建隆元年八月冊為皇后常服寬衣佐御膳善彈
箏鼓瑟晨起誦佛書事杜太后得驩心生子女三人皆

天乾德元年十二月崩年二十二有司上謚翰林學士
竇儀撰哀冊文二年四月葬安陵之北神主享於別廟
太平興國二年祔享太廟

孝章宋皇后河南洛陽人左衛上將軍偓之長女也母
漢永寧公主后幼時隨母入見周太祖賜冠帔乾德五
年太祖召見復賜冠帔時偓任華州節度后隨母歸鎮
孝明后崩復隨母來賀長春節開寶元年二月遂納入
宮為皇后年十七性柔順好禮每帝視朝退常具冠帔

候接佐御饌太祖崩號開寶皇后太平興國二年居西宮雍熙四年移居東宮至道元年四月崩年四十四有司上謚權殯普濟佛舍三年正月祔葬永昌陵北命吏部侍郎李至撰哀冊文神主享於別廟神宗時升祔太廟

太宗淑德尹皇后相州鄴人滁州刺史廷勛之女兄崇珂保信軍節度太宗在周時娶焉早薨及帝即位詔追冊為皇后并謚葬孝明陵西北神主享於別廟後升祔

太廟

懿德符皇后陳州宛邱人魏王彥卿第六女也周顯德中歸太宗建隆初封汝南郡夫人進封楚國夫人太宗封晉王改越國開寶八年薨年三十四葬安陵西北帝即位追冊為皇后謚懿德享於別廟至道三年十一月詔有司議太宗配宰相請以后配詔從之奉神主升祔太廟后姊周世宗后也淳化四年殂

明德李皇后潞州上黨人淄州刺史虔耘第二女開寶

中太祖為太宗聘為妃既納幣會太祖崩至太平興國三年始入宮年十九雍熙元年十二月詔立為皇后后性恭謹莊肅撫育諸子及嬪御甚厚嘗生皇子不育至道二年封后嫡母吳氏為衛國太夫人後改封楚國及封后母陳氏為韓國太夫人太宗崩真宗即位至道三年四月尊后為皇太后居西宮嘉慶殿咸平二年宰相請別建宮立名從之四年宮成移居之仍上宮名曰萬安景德元年崩年四十五謚明德權殯沙臺三年十月

祔葬永熙陵禮官請以懿德明德同祔太宗廟室以先
後為次從之

李賢妃真定人乾州防禦使英之女也太祖聞妃有容
德為太宗聘之開寶中封隴西郡君太宗即位進夫人
生皇女二人皆早亡次生楚王元佐妃嘗夢日輪逼已
以裾承之光耀遍體驚而寤遂生真宗太平興國二年
薨年三十四真宗即位追封賢妃又進上尊號為皇太
后有司上謚曰元德咸平三年祔葬永熙陵以中書侍

郎平章事李沆為園陵使車駕詣普安院攢宮素服行
禮拜伏嗚咽命駕部郎中知制誥梁周翰撰哀冊神主
祔別廟大中祥符元年追贈后父英檢校太尉安國軍
節度常山郡王母魏國太夫人大中祥符三年禮官趙
湘請以后祔太宗廟室真宗曰此重事也俟令禮官議
之六年秋宰相王旦與羣臣表請后尊號中去太字升
祔太廟明德之次從之

真宗章懷潘皇后大名人忠武軍節度美第八女真宗

在韓邸太宗為聘之封莒國夫人端拱二年五月薨年
二十二真宗即位追冊為皇后諡莊懷葬永昌陵之側
陵名保泰神主享於別廟舊制后諡冠以帝諡慶歷中
禮官言孝字連太祖諡德字連太宗諡遂改莊為章以
連真宗諡云

章穆郭皇后太原人宣徽南院使守文第二女淳化四
年真宗在襄邸太宗為聘之封魯國夫人進封秦國真
宗嗣位立為皇后景德四年從幸西京還以疾崩年三

十二后謙約惠下性惡奢靡族屬入謁禁中服飾華侈必加戒勗有以家事求言於上者后終不許兄子出嫁以貧欲祈恩賚但出裝具給之上尤加禮重及崩上深嗟悼禮官奏皇帝七日釋服特詔增至十三日太常上謚曰莊穆靈駕發引命翰林學士楊億撰哀冊葬永熙陵之西北神主享於別廟以后弟崇儀副使崇仁為莊宅使康州刺史姪承慶承壽皆遷官大中祥符中封后母高唐郡太夫人梁氏萊國太夫人仁宗即位升祔真

宗廟室改謚章穆

章獻明肅劉皇后其先家太原後徙益州為華陽人祖延慶在晉漢間為右驍衛大將軍父通虎捷都指揮使嘉州刺史從征太原道卒后通第二女也初母龐夢月入懷已而有娠遂生后后在襁褓而孤鞠於外氏善播鼗蜀人龔美者以鍛銀為業携之入京師后年十五入襄邸王乳母秦國夫人性嚴整因為太宗言之令王斥去王不得已置之王宮指使張耆家太宗崩真宗即位

入為美人以其無宗族乃更以美為兄弟改姓劉大中祥符中為修儀進德妃自章穆崩真宗欲立為皇后大臣多以為不可帝卒立之李宸妃生仁宗后以為己子與楊淑妃撫視甚至后性警悟曉書史聞朝廷事能記其本末真宗退朝閱天下封奏多至中夜后皆預聞宮闈事有問輒傳引故實以對天禧四年帝久疾居宮中事多決於后宰相寇準密議奏請皇太子監國以謀泄罷相用丁謂代之既而入內都知周懷政謀廢后殺謂

復用準以輔太子客省使楊崇勳內殿承制楊懷吉詣
謂告謂夜乘犢車挾崇勳懷吉造樞密使曹利用謀明
日誅懷政貶準衡州司馬於是詔皇太子開資善堂引
大臣決天下事后裁制於內真宗崩遺詔尊后為皇太
后軍國重事權取處分謂等請太后御別殿太后遣張
景宗雷允恭諭曰皇帝視事當朝夕在側何須別御一
殿於是請帝與太后五日一御承明殿帝位左太后位
右垂簾決事議已定太后忽出手書第欲禁中閱章奏

遇大事即召對輔臣其謀出於丁謂非太后意也謂既貶馮拯等三上奏請如初議帝亦以為言於是始同御承明殿百官表賀太后哀慟有司請制令稱吾以生日為長寧節出入御大安輦鳴鞭侍衛如乘輿令天下避太后父諱羣臣上尊號曰應元崇德仁壽慈聖太后御文德殿受冊天聖五年正旦太后御會慶殿羣臣及契丹使者班廷中帝再拜跪上壽是歲郊祀前出手書諭百官毋請加尊號禮成帝率百官恭謝如元日七年冬

至天子又率百官上壽范仲淹力言其非不聽九月詔
長寧節百官賜衣天下賜宴皆如乾元節明道元年冬
至復御文德殿有司陳黃麾仗設宮架登歌二舞明年
帝親耕耤田太后亦謁太廟乘玉輅服褱衣九龍花釵
冠齋於廟質明服袞衣十章減宗彘藻去劍冠儀天前
後垂珠翠十旒薦獻七室皇太妃亞獻皇后終獻加上
尊號曰應天齊聖顯功崇德慈仁保壽太后是歲崩年
六十五謚曰章獻明肅葬於永定陵之西北舊制皇后

皆二謚稱制加四謚自后始追贈三世皆至太師尚書
令兼中書令父封魏王初仁宗即位尚少太后稱制雖
政出宮闈而號令嚴明恩威加天下左右近習亦少所
假借宮掖間未嘗妄改作內外賜與有節柴氏李氏二
公主入見猶服髮髻太后曰姑老矣命左右賜以珠璣
帕首時潤王元份婦安國夫人李氏老髮且落見太后
亦請帕首太后曰大長公主太宗皇帝女先帝諸妹也
若趙家老婦寧可比耶舊賜大臣茶有龍鳳飾太后曰

此豈人臣可得命有司別製入香京挺以賜之賜族人
御食必易以釳器曰尚方器勿使入吾家也常服絕繡
練裙侍者見仁宗左右簪珥珍麗欲效之太后戒曰彼
皇帝嬪御飾也汝安得學先是小臣方仲弓上書請依
武后故事立劉氏廟而程琳亦獻武后臨朝圖后擲其
書於地曰吾不作此負祖宗事有漕臣劉綽者自京西
還言在庾有出贖糧千餘斛乞付三司后問曰卿識王
曾張知白呂夷簡曾宗道乎此四人豈因獻美餘進哉

后稱制凡十一年自仁宗即位乃諭輔臣曰皇帝聽斷之暇宜詔名儒講習經史以輔其德於是設幄崇政殿之西廡而日命近臣侍講讀丁謂曹利用既以侮權貶竄而天下惕然畏之晚稍進外家任內官羅崇勲江德明等訪外事崇勲等以此勢傾中外兄子從德死姻戚門人廝役拜官者數十人御史曹修古楊偕郭勸段少連論奏太后悉逐之太后保護帝既盡力而仁宗所以奉太后亦甚備上春秋長猶不知為宸妃所出終太后

之世無毫髮間隙焉及不豫帝為大赦悉召天下醫者
馳傳詣京師諸嘗為太后謫者皆內徙死者復其官其
後言者多追詆太后時事范仲淹以為言上曰此朕所
不忍聞也下詔戒中外毋輒言於是泰寧軍節度使錢
惟演請以章獻章懿與章穆並祔真宗室詔三省與禮
院議皆以謂章穆皇后位崇中壺已祔真宗廟室自協
一帝一后之文章獻明肅處坤元之尊章懿感日符之
貴功德莫與為比謂宜崇建新廟同殿異室歲時薦饗

一用太廟之儀仍別立廟名以崇世享翰林學士馮元等請以奉慈為名詔依慶歷五年禮院言章獻章懿二后請遵國朝懿德明德元德三后同祔太宗廟室故事遷祔真宗廟詔兩制議翰林學士王堯臣等議請遷二后祔序於章穆之次從之

李宸妃杭州人也祖延嗣仕錢氏為金華縣主簿父仁德終左班殿直初入宮為章獻太后侍兒莊重寡言真宗以為司寢既有娠從帝臨砌臺玉釵墜妃惡之帝心

卜釵完當為男子左右取以進釵果不毀帝甚喜已而生仁宗封崇陽縣君復生一女不育進才人後為婉儀仁宗即位為順容從守永定陵章獻太后使劉美張懷德為訪其親屬得其弟用和補三班奉職初仁宗在襁褓章獻以為己子使楊淑妃保視之仁宗即位妃嘿處先朝嬪御中未嘗自異人畏太后亦無敢言者終太后世仁宗不自知為妃所出也明道元年疾革進位宸妃薨年四十六初章獻太后欲以宮人禮治喪於外丞相

呂夷簡奏禮宜從厚太后遽引帝起有頃獨坐簾下召夷簡問曰一宮人死相公云云何歟夷簡曰臣待罪宰相事無內外無不當預太后怒曰相公欲離間吾母子耶夷簡從容對曰陛下不以劉氏為念臣不敢言尚念劉氏則喪禮宜從厚太后悟遽曰宮人李宸妃也且奈何夷簡乃請治喪用一品禮殯洪福院夷簡又謂入內都知羅崇勳曰宸妃當以后服殮用水銀實棺異時勿謂夷簡未嘗道及崇勳如其言後章獻太后崩燕王為

仁宗言陛下乃李宸妃所生妃死以非命仁宗號慟頓
毀不視朝累日下哀痛之詔自責尊宸妃為皇太后謚
莊懿幸洪福寺祭告易梓宮親哭視之妃玉色如生冠
服如皇太后以水銀養之故不壞仁宗嘆曰人言其可
信哉遇劉氏加厚陪葬永定陵廟曰奉慈又即景靈宮
建神御殿曰廣孝慶歷中改謚章懿升祔太廟拜用和
為彰信軍節度使檢校侍中寵賚甚渥既而追念不已
顧無以厚其家乃以福康公主下嫁用和之子瑋

楊淑妃益州郫人祖瑫父知儼知儼弟知信隸禁軍為
天武副指揮使妃年十二入皇子宫真宗即位拜才人
又拜婕妤進婉儀仍詔婉儀升從一品位昭儀上帝東
封西祀凡巡幸皆從章獻太后為修儀妃與之位幾埒
而妃通敏有智思奉順章獻無所忤章獻親愛之故妃
雖貴幸終不以為已間後加淑妃真宗崩遺制以為皇
太后始仁宗在乳褓章獻使妃護視凡起居飲食必與
之俱所以擁佑扶持恩意勤備及帝即位嘗召其姪永

德見禁中欲授以諸司副使妃辭曰小兒豈勝大恩小官可也更命為右侍禁章獻遺誥尊為皇太后居宮中與皇帝同議軍國事閣門趣百僚賀御史中丞蔡齊目臺吏毋追班乃入白執政曰上春秋長習知天下情偽今始親政事豈宜使女后相繼稱制乎乃詔刪去遺誥同議軍國事語第存后號奉緡錢二萬助湯沐後名其所居宮曰保慶稱保慶皇太后景祐三年無疾而薨年五十三殯於皇儀殿帝思其保護之恩命禮官議加服

小功初仁宗未有嗣后每勸帝擇宗子近屬而賢者養于宮中其選即英宗也英宗立言者謂禮慈母於子祭於孫止請廢后廟瘞其主園陵英宗弗欲遽也詔下有司議未上會帝崩遂罷后父祖皆累贈至一品知信贈節度使知信子景宗見外戚傳

沈貴妃宰相倫之孫父繼宗光祿少卿大中祥符初以將相家子被選初為才人歷美人婕妤充媛至德妃為人淑儉不華帝亦以妃家世故待之異衆長秋虛位帝

欲立之有從中沮之者不果嘉祐末進貴妃熙寧九年
薨年八十三許出殯其家車駕臨奠輟視朝三日謚昭
靜

仁宗郭皇后其先應州金城人平盧軍節度使崇之孫
也天聖二年立為皇后初帝寵張美人欲以為后章獻
太后難之后既立而頗見疎其後尚美人楊美人俱幸
數與后忿爭一日尚氏於上前有侵后語后不勝忿批
其頰上自起救之誤批上頤上大怒入內都知閻文應

因與上謀廢后且勸帝以爪痕示執政上以示呂夷簡
且告之故夷簡亦以前罷相怨后乃曰古亦有之后遂
廢詔封為淨妃王京冲妙仙師賜名清悟居長樂宮於
是中丞孔道輔諫官御史范仲淹段少連等十人伏閣
言后無過不可廢道輔等俱被黜責景祐元年出居瑤
華宮而尚美人亦廢於洞真宮入道楊美人別宅安置
又賜后號金庭教主冲靜元師後帝頗念之遣使存問
賜以樂府后和荅之辭甚愴惋帝嘗密令召入后曰若

再見召者須百官立班受冊方可屬小疾遣閻文應挾醫
診視數日乃言后暴薨中外疑閻文應進毒而不得其
實上深悼之追復皇后而停謚冊祔廟之禮

慈聖光獻曹皇后真定人樞密使曹武惠王彬之孫也
明道二年郭后廢詔聘入宮景祐元年九月冊為皇后
性慈儉重稼穡常於禁苑種穀親蠶繅善飛白書慶歷八
年閏正月帝將以望夕再張燈后諫止後三日衛卒數
人作亂夜越屋叩寢殿后方侍帝聞變遽起帝欲出后

閉閣擁持趣呼都知王守忠使引兵入賊傷宮嬪殿下
聲徹帝所宦者以乳媼毆小女子給奏后叱之曰賊在
近殺人敢妄言耶后度賊必縱火陰遣人挈水踵其後
果舉炬焚簾水隨滅之是夕所遣宦侍后皆親剪其髮
諭之曰明日行賞用是為驗故爭盡死力賊即禽滅閣
內妾與卒亂當誅祈哀幸姬姬言之帝貸其死后具衣
冠見請論如法曰不如是無以肅清禁掖帝命坐后不
可立請移數刻卒誅之張妃怙寵上僭欲假后蓋出游

帝使自來請后與之無靳色妃喜還以告帝曰國家文物儀章上下有秩汝張之而出外廷不汝置妃不憚而輟英宗方四歲育禁中后拊鞠周盡迨入為嗣子贊策居多帝夜暴疾崩后悉歛諸門鑰寘於前召皇子入及明宰臣韓琦等至奉英宗即位尊后為皇太后帝感疾請權同處分軍國事御內東門小殿聽政大臣日奏事有疑未決者則曰公輩更議之未嘗出己意頗涉經史多援以決事中外章奏日數十一一能紀綱要檢梃曹

氏及左右臣僕毫分不以假借宮省肅然明年夏帝疾益愈即命撤簾還政帝持書久不下及秋始行之敕有司崇峻典禮以弟侑同中書門下平章事神宗立尊為太皇太后名宮曰慶壽帝致極誠孝所以承迎娛悅無所不盡從行登翫每先後策掖后亦慈愛天至或退朝稍晚必自至屏扃候矚間親持饌飲以食帝外家男子舊母得入謁后春秋高侑亦老帝數言宜使入見輒不許他日侑侍帝帝復為請乃許之因偕詣后閣少焉帝

先起若令侑得伸親親意后遽曰此非汝所當得留趣遣出晚得水疾侍醫莫能治元豐二年冬疾甚帝視疾寢門衣不解帶旬日崩年六十四帝推恩曹氏拜侑中書令進官者四十餘人初王安石當國變亂舊章后乘間語神宗謂祖宗法度不宜輕改熙寧宗祀前數日帝至后所后曰吾昔聞民間疾苦必以告仁宗因赦行之今亦當爾帝曰今無他事后曰吾聞民間甚苦青苗助役宜罷之安石誠有才學然怨之者甚衆帝欲愛惜保

全之不若暫出之於外帝悚聽垂欲止復為安石所持
遂不果帝嘗有意於燕薊已與大臣議定乃詣慶壽宮
白其事后曰儲蓄賜予備乎鎧仗士卒精乎帝曰固已
辦之矣后曰事體至大吉凶悔吝生乎動得之不過南
面受賀而已萬一不諧則生靈所係未易以言苟可取
之太祖太宗收復久矣何待今日帝曰敢不受教蘓軾
以詩得罪下御史獄人以為必死后達豫中聞之謂帝
曰嘗憶仁宗以制科得軾兄弟喜曰吾為子孫得兩宰

相今聞軾以作詩繫獄得非仇人中傷之乎据至於詩其過微矣吾疾勢已篤不可以寬濫致傷中和宜熟祭之帝涕泣軾由此得免及崩帝哀慕毀瘠殆不勝喪有司上謚葬于永昭陵

張貴妃河南永安人也祖穎進士第終建平令父堯封亦舉進士為石州推官卒時堯封兄堯佐補蜀官堯封妻錢氏求挈孤幼隨之官堯佐不收恤以道遠辭妃幼無依錢氏遂納于章惠皇后宮寢長得幸有盛寵妃巧

慧多智數善承迎勢動中外慶歷元年封清河郡君歲中為才人遷修媛忽被疾曰妾姿薄不勝寵名願為美人許之皇祐初進貴妃後五年薨年三十一仁宗哀悼之追冊為皇后謚溫成追封堯封清河郡王謚景思而堯佐因緣僥倖致位通顯云

苗貴妃開封人父繼宗母許先為仁宗乳保出嫁繼宗帝登位得復通籍妃以容德入侍生唐王昞福康公主封仁壽郡君拜才人昭容德妃英宗育於禁中妃擁佑

頗有恩既踐祚酬其前勞進貴妃贈其父至太師吳國
公母陳楚國夫人福康下嫁當馳恩外家抑不肯言元
祐六年薨年六十九哲宗輟朝出奠發哀苑中謚曰昭
節

周貴妃開封人生四歲從其姑入宮張貴妃育為女稍
長遂得侍仁宗生兩公主帝崩妃日一疏食屏處一室
誦佛書因則假寐覺則復誦晝夜不解衣者四十年公
主下嫁錢景臻郭獻卿連進至賢妃徽宗立加貴妃歷

五朝勤約一致啟壽藏於周氏塋南傍建僧屋費緡錢
六萬皆貯儲奉賜郭公主先亡詔許出外第與親戚相
往來年九十三薨謚昭淑

楊德妃定陶人天聖中以章獻太后姻連選為御侍封
原武郡君進美人端麗機敏妙音律組紉書藝一過目
如素習父忠為侍禁仁宗欲加獎擢辭曰外官當積勞
以取貴今以恩澤微倖恐啟左右諛謁之端帝悅命徙
居肅儀殿贈其祖貴州刺史而官其叔弟五人積與郭

后不相能后既廢妃亦遣出後復召為嬪好歷修媛修儀熙寧五年薨年五十四贈德妃

馮賢妃東平人曾祖炳知雜御史祖起兵部侍郎妃以良家女九歲入宮及長得侍仁宗生邢魯國二公主封始平郡君帝將登其品秩力辭不拜養女林美人得幸神宗生二王而沒王尚幼妃保育如己子累加才人嬪好修容在禁掖幾六十年始終五朝動循禮度薨年七十七贈賢妃

英宗宣仁聖烈高皇后亳州蒙城人曾祖瓊祖繼勳皆有勲王室至節度使母曹氏慈聖光獻妃姊也故后少鞠宮中時英宗亦在帝所與后年同仁宗謂慈聖異日必以為配既長遂成昏濮邸生神宗皇帝岐王顥嘉王顥壽康公主治平二年冊為皇后后弟殿內崇班士林供奉久帝欲遷其官后謝曰士林獲升朝籍分量已過豈宜援先后家比辭之神宗立尊為皇太后居寶慈宮帝累欲為高氏營大第后不許久之但斥望春門外隙

地以賜凡營繕百役費悉出寶慈不調大農一錢元豐八年帝不豫浸劇宰執王珪等入問疾乞立延安郡王為皇太子太后權同聽政帝頷之珪等見太后簾下后泣撫王曰兒孝順自官家服藥未嘗去左右書佛經以祈福喜學書已誦論語七卷絕不好弄乃令王出簾外見珪等珪等再拜謝且賀是日降制立為皇太子初岐嘉二王日問起居至是令母輒入又陰敕中人梁惟簡使其妻製十歲兒一黃袍懷以來蓋密為踐祚倉卒備

也哲宗嗣位尊為太皇太后驛召司馬光呂公著未至
迎問今日設施所宜先未及條上已散遣修京城役夫
減皇城覘卒止禁庭工技廢導洛司出近侍尤無狀者
戒中外毋苛斂寬民間保戶馬事由中旨王珪等弗預
知又起文彥博於既老遣使勞諸途諭以復祖宗法度
為先務且令亟疏可用者從父遵裕坐西征失律抵罪
蔡確欲獻諛以固位乞復其官后曰遵裕靈武之役塗
炭百萬先帝中夜得報起環榻行徹旦不能寐聖情自

是驚悸馴致大故禍由遵裕得免刑誅幸矣先帝肉未
冷吾何敢顧私恩而違天下公議確悚慄而止光公著
至並命為相使同心輔政一時知名士彙進於廷凡熙
寧以來政事弗便者次第罷之於是以常平舊式改青
苗以嘉祐差役參募役除市易之法追茶鹽之禁舉邊
砦不毛之地以賜西戎而宇內復安契丹主戒其臣下
復勿生事於疆場曰南朝盡行仁宗之政矣蔡確坐車
蓋亭詩謫嶺表后謂大臣曰元豐之末吾以今皇帝所

書佛經出示人是時惟王珪曾奏賀遂定儲極且以子
繼父有何間言而確自謂有定策大功妄扇事端規為
異時眩惑地吾不忍明言姑託訕上為名逐之耳此宗
社大計姦邪怨謗所不暇恤也廷試舉人有司請循天
聖故事帝后皆御殿后止之又請受冊寶於丈德后曰
母后當陽非國家美事况天子正衙豈所當御就崇政
足矣上元燈宴后母當入觀止之曰夫人登樓上必加
禮是由吾故而越典制於心殊不安但令賜之燈燭遂

歲以為常姪公繪公紀當轉觀察使力遏之帝請至再
僅遷一秩終后之世不敢改又以官冗當汰詔損外氏
恩四之一以為宮掖先臨政九年朝廷清明華夏綏定
宋用臣等既被斥祈神宗乳媪入言之冀得復用后見
其來曰汝來何為得非為用臣等游說乎且汝尚欲如
曩日求內降干撓國政耶若復爾吾即斬汝媪大懼不
敢出一言自是內降遂絕力行故事抑絕外家私恩丈
思院奉上之物無問巨細終身不取其一人以為女中

堯舜元祐八年九月屬疾崩年六十二後二年章惇蔡卞邢恕始造為不根之謗皇太后太妃力辨其誣事乃已語在恕傳至高宗時昭暴惇卞恕罪褒錄后家贈曹夫人為魏魯國夫人弟士遜士林及公繪公紀皆追王擢從孫世則節度使他受恩者又十餘人云

宋史卷二百四十二

宋史卷二百四十二考證

英宗宣仁聖烈高皇后傳母曹氏慈聖光獻妃姊也○

臣蒲封按慈聖皇后未嘗為妃此誤

宋史卷二百四十二考證

欽定四庫全書

宋史卷二百四十三

元中書右丞相總裁托克托等修

列傳第二

后妃下

神宗欽聖獻肅向皇后 欽成朱皇后

欽慈陳皇后 林賢妃

武賢妃

哲宗昭慈孟皇后

昭懷劉皇后

徽宗顯恭王皇后

鄭皇后

王貴妃

韋賢妃

喬貴妃

劉貴妃

欽宗朱皇后

高宗憲節邢皇后

憲聖慈烈吳皇后

潘賢妃

張賢妃

劉貴妃

劉婉儀

張貴妃

孝宗成穆郭皇后

成恭夏皇后

成肅謝皇后

蔡貴妃

李賢妃

光宗慈懿李皇后

黃貴妃

寧宗恭淑韓皇后

恭聖仁烈楊皇后

理宗謝皇后

度宗全皇后

楊淑妃

神宗欽聖憲肅向皇后河內人故宰相敏中曾孫也治平三年歸於潁邸封安國夫人神宗即位立爲皇后帝不豫后贊宣仁后定建儲之議哲宗立尊爲皇太后宣仁命葺慶壽故宮以居后后辭曰安有姑居西而婦處東瀆上下之分不敢徙遂以慶壽後殿爲隆祐宮居之帝將卜后及諸王納婦后敕向族勿以女寘選中族黨有欲援例以恩換閭職及爲選人求京秩者且言有特旨后曰吾族未省用此例何庸以私情撓公法一不與

帝倉卒晏駕獨決策迎端王章惇異議不能沮徽宗立請權同處分軍國事后以長君辭帝泣拜移時乃聽凡紹聖元符以還惇所斥逐賢大夫士稍稍收用之故事有如御正殿避家諱立誕節之類皆不用至間賓召故老寬徭息兵愛民崇儉之舉則喜見于色纔六月即還政明年正月崩年五十六帝追念不已乃數加恩兩舅宗良宗回皆位開府儀同三司封郡王而自敏中以上三世亦追列王爵非常典也

欽成朱皇后開封人父崔傑早世母李更嫁朱士安后
鞠於所親任氏熙寧初入宮爲御侍進才人婕妤生哲
宗及蔡王似徐國公主累進德妃哲宗即位尊爲皇太
妃時宣仁欽聖二太后皆居尊故稱號未極元祐三年
宣仁詔春秋之義母以子貴其尋繹故實務致優隆於
是輿蓋仗衛冠服悉侔皇后紹聖中欽聖復命即閣建
殿改乘車爲輿出入由宣德東門百官上牋稱殿下名
所居爲聖瑞宮贈崔任朱三父皆至師保徽宗立奉禮

尤謹崇寧元年二月薨年五十一追冊爲皇后上尊謚
陪葬永裕陵

欽慈陳皇后開封人幼穎悟莊重選入掖庭爲御侍生
徽宗進美人帝崩守陵殿思顧舊恩毀瘠骨立左右進
粥藥揮使去曰得早侍先帝願足矣未幾薨年三十二
建中靖國元年追冊爲皇太后上尊謚陪葬永裕陵

林賢妃南劒人三司使特之孫司農卿洙之女幼選入
宮既長遂得幸封永嘉郡君升美人生燕王俟越王偁

邢國公主進婕妤元祐五年薨詔用一品禮葬贈貴儀
又贈賢妃

武賢妃始以選入宮元豐五年進才人生吳王佖賢和
公主歷美人婕妤徽宗即位進昭儀賢妃大觀元年薨
乘輿臨奠輟朝三日謚曰惠穆

哲宗昭慈聖獻孟皇后洺州人眉州防禦使馬軍都虞
候贈太尉元之孫女也初哲宗既長宣仁高太后歷選
世家女百餘入宮后年十六宣仁及欽聖向太后皆愛

之教以女儀元祐七年諭宰執孟氏子能執婦禮宜正位中宮命學士草制又以近世禮儀簡略詔翰林臺諫給舍與禮官議冊后六禮以進至是命尚書左僕射呂大防攝太尉充奉迎使同知樞密院韓忠彥攝司徒副之尚書左丞蘓頌攝太尉充發策使僉書樞密院事王巖叟攝司徒副之尚書右丞蘓轍攝太尉充告期使皇叔祖同知大宗正事宗景攝宗正卿副之皇伯祖判大宗正事高密郡王宗晟攝太尉充納成使翰林學士范

百祿攝宗正卿副之吏部尚書王存攝太尉充納吉使
權戶部尚書劉奉世攝宗正卿副之翰林學士梁燾攝
太尉充納采問名使御史中丞鄭雍攝宗正卿副之帝
親御文德殿冊爲皇后宣仁太后語帝曰得賢內助非
細事也進后父閣門祇候在爲崇儀使榮州刺史母王
氏華原郡君久之劉婕妤有寵紹聖三年后朝景靈宮
訖事就坐諸嬪御立侍劉獨背立簾下后閣中陳迎兒
呵之不顧閣中皆忿冬至日會朝欽聖太后於隆祐宮

后御坐朱髹金飾宮中之制惟后得之婕妤在他坐有
愠色從者爲易坐製與后等衆弗能平因傳唱曰皇太
后出后起立劉亦起尋各復其所或已撤婕妤坐遂仆
于地懟不復朝泣訴於帝內侍郝隨謂婕妤曰母以此
戚戚願爲大家早生子此坐正當爲婕妤好有也會后女
福慶公主疾后有姊頗知醫嘗已后危疾以故出入禁
掖公主藥弗效持道家治病符水入治后驚曰姊寧知
宮中禁嚴與外間異邪令左右藏之俟帝至具言其故

帝曰此人之常情耳后即藝符於帝前宮禁相傳厭魅之端作矣未幾后養母聽宣夫人燕氏尼法端與供奉官王堅為后禱祠事間詔入內押班梁從政管當御藥院蘓珪即皇城司鞠之捕逮宦者宮妾幾三十人擄掠備至肢體毀拆至有斷舌者獄成命侍御史董敦逸覆錄罪人過庭下氣息僅屬無一人能出聲者敦逸秉筆疑未下郝隨等以言脅之敦逸畏禍及已乃以奏牘上詔廢后出居瑤華宮號華陽教主玉清妙靜仙師法名

沖真初章惇誣宣仁后有廢立計以后逮事宣仁惇又陰附劉賢妃欲請建為后遂與郝隨構成是獄天下寃之敦逸奏言中宮之廢事有所因情有可察詔下之日天爲之陰翳是天不欲廢后也人爲之流涕是人不欲廢后也且言嘗覆錄獄事恐得罪天下後世帝曰敦逸不可更在言路曾布曰陛下本以皇城獄出於近習推治故命敦逸錄問今乃貶錄問官何以取信中外乃止帝久亦悔之曰章惇誤我元符末欽聖太后將復后位

適有布衣上書以后為言者即命以官於是詔后還內
號元祐皇后時劉號元符皇后故也崇寧初郝隨諷蔡
京再廢后昌州判官馮澌上書言后不得復臺臣錢適
石豫左膚等連章論韓忠彥等信一布衣狂言復已廢
之后以掠虛美望斷以大義蔡京與執政許將溫益趙
挺之張商英皆主其說徽宗從之詔依紹聖詔旨復居
瑤華宮加賜希微元通知和妙靜仙師靖康初瑤華宮
火徙居延寧宮又火出居相國寺前之私第金人圍汴

欽宗與近臣議再復后尊為元祐太后詔未下而京城陷時六宮有位號者皆北遷后以廢獨存張邦昌僭位尊后為宋太后迎居延福宮受百官朝胡舜陟馬伸又言政事當取后旨邦昌乃復上尊號元祐皇后迎入禁中垂簾聽政后聞康王在濟遣尚書左右丞馮澥李回及兄子忠厚持書奉迎命副都指揮使郭仲荀將所部扈衛又命御營前軍統制張俊逆於道尋降手書播告天下王至南京后遣宗室士儼及內侍邵成章奉圭寶

乘輿服御迎王即皇帝位改元后以是日撤簾尊后爲元祐太后尚書省言元字犯后祖名請易以所居宮名遂稱隆祐太后上將幸揚州命仲荀衛太后先行駐揚州州治會張浚請先定六宮所居地遂詔忠厚奉太后幸杭州以苗傅爲扈從統制踰年傅與劉正彥作亂請太后聽政又請立皇子太后諭之曰自蔡京王黼更祖宗法童貫起邊事致國家禍亂今皇帝無失德止爲黃潛善汪伯彥所誤皆已逐矣傅等言必立皇太子太后

曰今強敵在外我以婦人抱三歲小兒聽政將何以令天下傳等泣請太后力拒之帝聞事急詔禪位元子太后垂簾聽政朱勝非請令臣僚得獨對論機事仍日引傳黨一人上殿以釋其疑太后從之每見傳等曲加慰撫傳等皆喜韓世忠妻梁氏在傳軍中勝非以計脫之太后召見勉令世忠速來以清嚴陞梁氏馳入世忠軍諭太后意世忠等遂引兵至逆黨懼朱勝非等誘以復辟命王世修草狀進呈太后喜曰吾責塞矣再以手札

趣帝還宮即欲撤簾帝令勝非請太后一出御殿乃命
撤簾是日上皇太后尊號太后聞張浚忠義欲一見之
帝爲召浚至禁中承議郎馮楫嘗貽書苗傅勸復辟上
未之知太后白其事楫得遷秩帝幸建寧命僉書樞密
院事鄭穀衛太后繼發比至帝率羣臣迎於郊會防秋
迫命劉寧止制置江浙衛太后往洪州百司非預軍事
者悉從仍命滕康劉珪權知三省樞密院事從行凡四
方奏讞吏部差注舉辟功賞之類皆隸焉復命四廂都

指揮使楊惟忠將兵萬人衛從帝慮敵人來侵密諭康
珏緩急取太后旨便宜以行過落星寺舟覆宮人溺死
者十數惟太后舟無虞既至洪州議者言金人自蘄黃
渡江陸行二百餘里即到洪州帝憂之命劉光世屯江
州光世不爲備金人遂自大冶縣徑趣洪州康珏奉太
后行次吉州金人追急太后乘舟夜行質明至太和縣
舟人景信反楊惟忠兵潰失宮人一百六十康珏俱遁
兵衛不滿百遂往虔州太后及潘妃以農夫肩輿而行

帝慮太后徑入閩廣遣使歷詢后所在及知在虔州遂
命中書舍人李正民來朝謁時虔州府庫皆空衛軍所
給惟得沙錢市買不售與百姓交鬪縱火肆掠土豪陳
新率衆圍城康珏惟忠弗能禁惟忠步將胡友自外引
兵破新於城下新乃去帝聞罷康珏命盧益李回代之
諭輔臣曰朕初不識太后自迎至南京愛朕不啻己出
今在數千里外兵馬驚擾當亟奉迎以愜朕朝夕慕念
之意遂遣御營司都統辛企宗帶御器械潘永思迎歸

太后至越帝親迎於行宮門外遍問所過守臣治狀入宮禁中嘗微若風眩有宮人自言善符呪疾良已太后驚曰吾豈敢復聞此語耶立命出之太后生辰置酒宮中從容謂帝曰宣仁太后之賢古今母后未有其比昔奸臣肆為謗誣雖嘗下詔明辨而國史尚未刪定豈足傳信吾意在天之靈不無望於帝也帝聞之悚然後廼更修神宗哲宗實錄始得其正而奸臣情狀益著帝事太后極孝雖帷帳皆親視或得時果必先獻太后然後

敢嘗宣教郎范燾與忠厚有憾誣與太后密養欽宗子
帝曰朕於太后如母子安得有此即治其罪紹興五年
春患風疾帝旦暮不離左右衣弗解帶者連夕四月崩
於行宮之西殿年五十九遺命擇地攢殯俟軍事寧歸
葬園陵帝詔曰朕以繼體之重當從重服凡喪祭用母
后臨朝禮上尊號曰昭慈獻烈皇太后推恩外家凡五
十人殯于會稽上皇村祔神主於哲宗室位在昭懷皇
后上三年改謚昭慈聖獻后性節儉謙謹有司月供千

緡而止幸南昌斥賣私絹三千匹充費尋詔文書應奏者避后父名不許羣臣請上太皇太后號亦不許忠厚直顯謨閣臺諫給舍交章論列后聞即令易武命學士院降詔戒敕忠厚等不得與聞朝政通貴近至私第謁見宰執以恩澤當得官者近八十員后未嘗陳請初后受冊日宣仁太后歎曰斯人賢淑惜福薄耳異日國有事變必此人當之後皆如所云

昭懷劉皇后初為御侍明豔冠後庭且多才藝由美人

婕妤進賢妃生一子二女有盛寵能順意奉兩宮時孟后位中宮后不循列妾禮且陰造奇語以售謗內侍郝隨劉友端爲之用孟后既廢后竟代焉右正言鄒浩上疏極諫坐竄徽宗立冊爲元符皇后明年尊爲太后名宮崇恩帝緣哲宗故曲加恩禮后以是頗干預外事且以不謹聞帝與輔臣議將廢之而后已爲左右所逼即簾鉤自縊而崩年三十五

徽宗顯恭王皇后開封人德州刺史藻之女也元符二

年六月歸於端邸封順國夫人徽宗即位冊為皇后生
欽宗及崇國公主后性恭儉鄭王二妃方亢寵后待之
均平巨闥妄意迎合誣以闇昧帝命刑部侍郎周鼎即
秘獄參驗略無一跡獄止后見帝未嘗一語輒及帝幡
然憐之大觀二年崩年二十五謚曰靜和葬裕陵之次
紹興中始祔徽宗廟室改上今謚云

鄭皇后開封人也父紳始為直省官以后貴累封太師
樂平郡王后本欽聖殿押班徽宗為端王每日朝慈德

宮欽聖命鄭王二押班供侍及即位遂以二人賜之后
自入宮好觀書章奏能自製帝愛其才崇寧初封賢妃
遷貴妃有異寵徽宗多賚以詞章天下歌之王皇后崩
政和元年立為皇后將受冊有司創製冠服后言國用
未足冠珠費多請命工改製妃時舊冠又乞罷黃麾仗
小駕鹵簿等儀從之恩澤皆弗陳請時族子居中在樞
府后奏外戚不當預國政必欲用之且令充外職帝爲
罷居中居中復用后歸寧還言居中與父紳相往還人

皆言其招權市賄乞禁絕許御史奏劾后性端謹善順承帝意劉貴妃薨帝思之不已將追冊為后后即奏妃乃其養子乞別議褒崇之禮帝大喜欽宗受禪尊為太上皇后遷居寧德宮稱寧德太后從上皇幸南京金師退先歸時用事者言上皇將復辟於鎮江人情危駭或謂后将由端門直入禁中內侍輩頗勸欽宗嚴備帝不從出郊迎后於是兩宮歡甚洽上皇聞之即罷如洛之議汴京破從上皇幸青城北遷留五年崩于五國城年

五十二紹興七年何蘓等使還始知上皇及后崩高宗
大慟詔立重成服謚顯肅后親族各遷官有差祔主徽
宗室以聞哀日為大忌梓宮歸入境承之以櫛納翬衣
其中與徽宗合攢于會稽永祐陵先是后至金營訴於
粘罕曰妾得罪當行但妾家屬不預朝政乞留不遣粘
罕許之故紳得歸后既行紳亦以是年薨謚僖靖家屬
流寓江南高宗憐之詔所在尋訪賜官有鄭藻者后近
屬也紹興中帶御器械用后祔廟恩拜隴州防禦使凡

四使金歷官至保信軍節度使加太尉卒追封榮國公
謚端靖

王貴妃與鄭后俱為押班徽宗立封平昌郡君進位至
貴妃生鄆王楷莘王植陳王機惠淑康淑順德柔福冲
懿帝姬政和七年九月薨謚曰懿肅

韋賢妃開封人高宗母也初入宮為侍御崇寧末封平
昌郡君大觀初進婕妤累遷婉容高宗在康邸出使進
封龍德宮賢妃從上皇北遷建炎改元遙尊為宣和皇

后封其父安道為郡王官親屬三十人由是遣使不絕
紹興七年徽宗及鄭皇后崩聞至帝號慟諭輔臣曰宣
和皇后春秋高朕思之不遑寧處屈已講和正為此耳
翰林學士朱震引唐建中故事請遥尊為皇太后從之
已而太常少卿吳表臣請依嘉祐治平故事俟三年喪
畢然後舉行乃先降御札播告天下后三代俱追封王
帝以后久未歸每輦蹙曰金人若從朕請餘皆非所問
也王倫使回言金人許歸后未幾金人遣蕭括來亦言

后將歸狀遂豫作慈壽宮命莫將韓恕爲奉迎使十年以金人猶未歸后乃遙上皇太后冊寶於慈寧殿是後生辰至朔皆遙行賀禮洪皓在燕求得后書遣李微持歸帝大喜曰遣使百輩不如一書遂加微官金人遣蕭毅邢具瞻來議和帝曰朕有天下而養不及親徽宗無及矣今立誓信當明言歸我太后朕不耻和不然朕不憚用兵毅等還帝又語之曰太后果還自當謹守誓約如其未也雖有誓約徒爲虛文命何鑄曹勛報謝召至

內殿諭之曰朕北望庭闈無淚可揮卿見金主當曰慈親之在上國一老人耳在本國則所繫甚重以至誠說之庶彼有感動鑄等至金國首以后歸爲請金主曰先朝業已如此豈可輒改勛再三懇請金主始允鑄等就館館伴耶律紹文來言金主許從所請洪皓聞之先遣人來報鑄等還具言其實遂命參政王次翁爲奉迎使金人遣其臣高居安完顏宗賢等扈從以行十二年四月次燕山自東平舟行由清河至楚州既渡淮命太后

弟安樂郡王韋淵秦魯國大長公主吳國長公主迎于
道帝親至臨平奉迎普安郡王宰執兩省三衙管軍皆
從帝初見太后喜極而泣八月至臨安入居慈寧宮先
是以梓宮未還詔中外輟樂至是慶太后壽節始用樂
謁家廟親屬遷官幾二千人太后聰明有智慮初金人
許還三梓宮太后恐其反覆呼役者畢集然後起攢時
方暑金人憚行太后慮有他變乃陽稱疾須秋涼盡發
已而稱貸于金使得黃金三千兩以犒其衆由是途中

無間言太后在北方聞韓世忠名次臨平呼世忠至簾前慰勞還宮帝侍太后或至夜分未去太后曰且休矣聽朝宜早恐妨萬幾又嘗謂兩宮給使宜令通用不然則有彼我之分而佞人間言易以入也時皇后未立太后屢爲帝言帝請降手書太后曰我但知家事外庭非所當預將行冊命承平典禮悉能記之帝先意承志惟恐不及或一食稍減輒不勝憂懼常戒宮人曰太后年已六十惟優游無事起居適意即壽考康寧事有所闕

慎母令太后知第來白朕十九年太后年七十正月朔
即宮中行慶壽禮親屬各遷官一等太后微恙累月不
出殿門會牡丹盛開帝入白太后欣然步至花所因留
宴竟日盡歡翌日以諭宰執后苦目疾募得醫皇甫坦
治即愈二十九年太后壽登八十復行慶禮親屬進官
一等庶人年九十宗子女若貢士已上父母年八十者
悉官封之九月得疾上不視朝敕輔臣祈禱天地宗廟
社稷赦天下減租稅俄崩于慈寧宮諡曰顯仁攢於永

佑陵之西祔神主太廟徽宗室親屬進秩者十四人授
官者三人太后性節儉有司進金唾壺太后易令用塗
金宮中賜予不過三數千所得供進財帛多積於庫至
是喪葬之費皆仰給焉然好佛老初高宗出使有小妾
言見四金甲人執刀劒以衛太后曰我祠四神謹甚必
其陰助既北遷常設祭及歸立祠西湖上

喬貴妃初與高宗母韋妃俱侍鄭皇后結為姊妹約先
貴者毋相忘既而貴妃得幸徽宗遂引韋氏二人愈相

得二帝北遷貴妃與韋氏俱至是韋妃將還貴妃以金五十兩贈高居安曰薄物不足為禮願好護送姊還江南復舉酒酌韋氏曰姊善重保護歸即為皇太后妹無還期終死於朔漠矣遂大慟以別

劉貴妃其出單微入宮即大幸由才人七遷至貴妃生濟陽郡王棧祁王模信王榛政和三年秋薨先是妃手植芭蕉於庭曰是物長吾不及見矣已而果然左右奔告帝帝初以其微疾不經意趣幸之已薨矣始大悲惻

特加四字謚曰明達懿文叙其平生絃諸樂府又欲踵
溫成故事追崇使皇后表請因冊贈為后而以明達謚
焉時又有安妃劉氏者本酒保家女初事崇恩宮宮罷
出居官者何訢家內侍楊戩譽其美復召入妃以同姓
養為女遂有寵為才人進至淑妃生建安郡王模嘉國
公椅英國公穗和福帝姬政和四年加貴妃朝夕得侍
上擅愛顙席嬪御為之稀進擢其父劉宗元節度使妃
天資警悟解迎意合旨雅善塗飾每製一服外間即倣

之林靈素以技進目為九華玉真安妃肖其像於神霄
帝君之左宣和三年薨年三十四初謚明節和文旋用
明達近比加冊贈為皇后葬其園之西北隅帝悼之甚
後宮皆往唁帝相與啜泣崔妃獨左視無戚容帝悲怒
疑其為厭蠱卜者劉康孫緣妃以進喜妄談休咎捕送
開封獄醫曹孝忠侍疾無狀閤內侍王堯臣坐盜金珠
及出金明池遊宴事併鞫治獄成同日誅死遂廢崔妃
為庶人崔生漢王椿及帝姬五人云

欽宗朱皇后開封祥符人父伯材武康軍節度使欽宗在東宮徽宗臨軒備禮冊為皇太子妃欽宗即位立為皇后追封伯材為恩平郡王后既北遷不知崩聞慶元三年上尊號謚仁懷祔於太廟欽宗室推恩后家十五年五年奉安神御于景靈宮兄二人孝孫靖康中以節鉞換授右金吾衛上將軍卒贈開府儀同三司孝章一曰孝莊官至永慶軍承宣使卒贈昭化軍節度使

高宗憲節邢皇后開封祥符人父煥朝請郎高宗居康

邸以婦聘之封嘉國夫人王出使夫人留居蕃衍宅金
人犯京師夫人從三宮北遷上皇遣曹勛歸夫人脫所
御金環使內侍持付勛曰幸為吾白大王願如此環得
早相見也王憐之及即位遙冊為皇后官后親屬二十
五人紹興九年崩于五國城年三十四金人祕之高
宗虛中宮以待者十六年顯仁太后回鑾始得崩聞上
為輟朝行釋服之祭謚懿節祔主於別廟紹興十二年
八月后梓宮至攢于聖獻太后梓宮之西北帝思后殊

慘不樂皇后吳氏知帝意乃請為其姪珣琚婚邢氏二女以慰帝心淳熙末改謚憲節祔高宗廟

憲聖慈烈吳皇后開封人父近以后貴累官武翼郎贈太師追封吳王謚宣靖近嘗夢至一亭匾曰侍康傍植芍藥獨放一花殊妍麗可愛花下白羊一近寤而異之后以乙未歲生方產時紅光徹戶外年十四高宗為康王被選入宮人謂侍康之徵王即帝位后常以戎服侍左右后頗知書從幸四明衛士謀為變入問帝所在后

給之以免未幾帝航海有魚躍入御舟后曰此周人白
魚之祥也帝大悅封和義郡夫人還越進封才人后益
博習書史又善翰墨由是寵遇日至與張氏並為婉儀
尋進貴妃顯仁太后回鑾亦愛后憲節皇后崩聞至秦
檜等累表請立中宮太后亦為言紹興十三年詔立貴
妃為皇后帝御文德殿授冊后即穆清殿建受之追王
三代親屬由后官者三十五人顯仁太后性嚴肅后身
承起居順適其意嘗繪古烈女圖置坐右為鑒又取詩

序之義扁其堂曰賢志初伯琮以宗子召入宮命張氏育之后時為才人亦請得育一子於是得伯玖更名璩中外議頗籍籍張氏卒併育于后后視之無間伯琮性恭儉喜讀書帝與后皆愛之封普安郡王后嘗語帝曰普安其天日之表也帝意決立為皇子封建王出璩居紹興高宗內禪手詔后稱太上皇后遷居德壽宮孝宗即位上尊號曰壽聖太上皇后月朔朝上皇畢入見后如宮中儀乾道七年加號壽聖明慈淳熙二年以上皇

行慶壽禮復加壽聖齊明廣慈之號十年以后年七十親屬推恩有差十二年加尊號曰備德上皇崩遺詔改稱皇太后帝欲迎還大内太后以上皇几筵在德壽宮不忍舍去因名所御殿曰慈福居焉光宗即位更號壽聖皇太后以壽皇故不稱太皇太后也帝嘗言及用人后曰宜崇尚舊臣紹熙四年后壽八十帝乃覲后奉冊禮加尊號曰隆慈備福五年正月帝率羣臣行慶壽禮嘉王侍側后勉以讀書辨邪正立綱常為先夏孝宗崩

始正太皇太后之號時光宗疾未平不能執喪宰臣請垂簾主喪事后不可已而宰執請如唐肅宗故事羣臣發喪太極殿成服禁中許之后代行祭奠禮尋用樞密趙汝愚請於梓宮前垂簾宣光宗手詔立皇子嘉王為皇帝翌日冊夫人韓氏為皇后撤簾慶元元年加號光祐遷居重華宮汝愚後以謫死中書舍人汪義端目汝愚為李林甫欲併逐其黨太后聞而非之三年十月后寢疾詔禱天地宗廟社稷大赦天下踰月而崩年八十

三遺詔太上皇帝疾未痊瘳宜於宮中承重皇帝服齊
衰五月以日易月詔服期年喪謚曰憲聖慈烈攢祔于
永思陵

潘賢妃開封人元懿太子母也父永壽直翰林醫局官
高宗居康邸時納之邢后北遷妃未有位號帝即位將
立為后呂好問諫止之立為賢妃太子薨從隆祐太后
于江西踰年還紹興十八年薨永壽贈太子少師

張賢妃開封人建炎初為才人有寵進婕妤帝欲擇宗

室子養禁中輔臣問帝以宮中可付託者誰耶帝曰已得之矣意在婕妤已而伯琮入宮年尚幼婕妤與潘賢妃吳才人方環坐以觀其所向時賢妃新失皇子意忽忽不樂婕妤手招之遂向婕妤帝因命婕妤母之是為孝宗尋遷婉儀十二年卒上為輟朝二日贈賢妃弟萃閣門宣贊舍人妃薨遷秩二階

劉貴妃臨安人入宮為紅霞帔遷才人累遷婕妤婉容紹興二十四年進賢妃頗恃寵驕侈嘗因盛夏以水晶

飾脚踏帝見之命取為枕妃懼撤去之淳熙十四年薨
父懋累官昭慶軍節度使金人南侵獻錢二萬緡以助
軍興費懋子允升紹興末為和州防禦使知閤門事奉
使還遷荊州防禦使福州觀察使

劉婉儀初入宮封宜春郡夫人尋進才人與劉婉容俱
被寵進婉儀婉儀頗恃恩招權嘗遣人諷廣州番商獻
明珠香藥許以官爵舶官林孝澤言于朝詔止其獻金
人將叛盟劉錡主戰幸醫王繼先從中沮之因謀誅錡

帝不懌一日在婉儀位有憂色婉儀陰訪得其言以寬
譬帝意帝恠與繼先言合詰之婉儀急具以實對帝大
怒託以他故廢之兄仇累官和州防禦使知閤門事婉
儀既廢乃與祠罷歸

張貴妃開封祥符人初入宮封永嘉郡夫人乾道六年
進婉容淳熙七年封太上皇淑妃十六年進貴妃紹熙
元年薨美人馮氏才人韓氏吳氏李氏王氏俱被寵幸
後皆廢吳氏中宮近屬也紹興三十年復故封李氏王

氏俱明豔淳熙末上皇愛之及崩憲聖后見二才人每
感憤孝宗即追告命許自便蓋非常制云

孝宗成穆郭皇后開封祥符人奉直大夫直卿之女孫
其六世祖為章穆皇后外家孝宗為普安郡王時納郭
氏封咸寧郡夫人生光宗及莊文太子惇魏惠憲王愷
邵悼肅王恪紹興二十六年薨年三十一追封淑國夫
人三十一年用明堂恩贈福國夫人既建太子追封皇
太子妃及受禪追冊為皇后謚恭懷尋改安穆及營阜

陵又改成穆祔孝宗廟父瑛累官昭慶軍承宣使追封
榮王孝宗待郭氏恩禮彌厚然不假外戚以官爵后弟
師禹師元官不過承宣使師元不及建節而卒將內禪
師禹始除節度使光宗朝官至太保封永寧郡王

成恭夏皇后袁州宜春人曾祖令吉為吉水簿夏氏初
入宮為憲聖太后閣中侍御普安郡王夫人郭氏薨太
后以夏氏賜王封齊安郡夫人即位進賢妃踰年奉上
皇命立為皇后乾道二年謁家廟親屬推恩十一人三

年崩謚安恭寧宗時改謚成恭初后之生也有異光穿
室父協奇之及長以姿納宮中久之父居益困及歸客
袁之僧舍號夏翁翁亡后始貴訪得其弟執中補承信
郎閤門祗候未幾遷右武郎閤門宣贊舍人累遷奉國
軍節度使提舉萬壽觀寧宗即位加少保踰年卒于家
初執中與其微時妻至京宮人諷使出之擇配貴族欲
以媚后執中弗為動他日后親為言執中誦宋弘語以
對后不能奪既貴始從師學作大字頗工復善騎射高

宗行慶壽禮近戚爭獻珍環執中獨大書一人有慶萬壽無疆以獻高宗喜賜賚甚渥嘗為館伴副使連射皆命中金人駭服孝宗聞其才將召用之謝曰他日無累陛下保全足矣人以此益賢之

成肅謝皇后丹陽人幼孤鞠于翟氏因冒姓焉及長被選入宮憲聖太后以賜普安郡王封咸安郡夫人王即位進婉容踰年進貴妃成恭皇后崩中宮虛位淳熙三年妃侍帝過德壽宮上皇諭以立后意尋遣張去為傳

旨立貴妃為皇后復姓謝氏親屬推恩者十人光宗受
禪上尊號壽成皇后孝宗崩尊為皇太后慶元初加號
惠慈嘉泰二年加慈佑太皇太后三年崩謚成肅攢祔
于永阜陵后性儉慈減膳羊每食必先以進御服澣濯
衣有數年不易者弟淵以后貴授武翼郎后嘗戒之曰
主上化行恭儉吾亦躬服澣濯爾宜崇謙抑遠驕侈後
歷閤門宣贊舍人帶御器械光宗朝遷果州團練使寧
宗立轉萊州防禦使擢知閤門事仍幹辦皇城司三遷

至保信軍節度使尋加太尉開府儀同三司成肅皇后崩遺誥賜淵錢十萬緡金二千兩田十頃餽緡日十千後累陞三少封和國公嘉定四年薨贈太保

蔡貴妃初入宮為紅霞帔封和義郡夫人進婉容淳熙十年冬拜貴妃十二年秋薨父滂宜春觀察使

李賢妃初入宮為典字轉通義郡夫人進婕妤淳熙十年卒贈賢妃時李燾在經筵嘗諫省後宮費帝曰朕老矣安有是近葬李妃用三萬緡耳帝雖在位久後宮寵

幸無著聞者

光宗慈懿李皇后安陽人慶遠軍節度使贈太尉道之
中女初后生有黑鳳集道營前石上道心異之遂字后
曰鳳娘道帥湖北聞道士皇甫坦善相人乃出諸女拜
坦坦見后驚不敢受拜曰此女當母天下坦言於高宗
遂聘為恭王妃封榮國夫人進定國夫人乾道四年生
嘉王七年立為皇太子妃性妬悍嘗訴太子左右于高
孝二宮高宗不懌謂吳后曰是婦將種吾為皇甫坦所

誤孝宗亦屢訓后宜以皇太后為法不然行當廢汝后疑其說出於太后及太子即位冊為皇后光宗欲誅官者近習皆懼遂謀離間三宮會帝得心疾孝宗購得良藥欲因帝至宮授之官者遂訴於后曰太上合藥一大丸俟宮車過即投藥萬一有不虞其奈宗社何后覘藥實有心術之頃之內宴后請立嘉王為太子孝宗不許后曰妾六禮所聘嘉王妾親生也何為不可孝宗大怒后退持嘉王泣訴于帝謂壽皇有廢立意帝惑之遂不

朝太上帝嘗宮中浣手睹宮人手白悅之他日后遣人送食合于帝啓之則宮人兩手也又黃貴妃有寵因帝親郊宿齊宮后殺之以暴卒聞是夕風雨大作黃壇燭盡滅不能成禮帝疾由是益增劇不視朝政事多決于后矣后益驕奢封三代為王家廟逾制衛兵多于太廟后歸謁家廟推恩親屬二十六人使臣一百七十二人下至李氏門客亦奏補官中興以來未有也是時帝久不朝太上中外疑駭紹熙四年九月重明節宰執侍從

臺諫連章請帝過宮給事中謝深甫言父子至親天理昭然太上之愛陛下亦猶陛下之愛嘉王太上春秋高千秋萬歲後陛下何以見天下帝感悟趣命駕朝重華宮是日百官班列俟帝出至御屏后挽留帝入曰天寒官家且飲酒百僚侍衛相顧莫敢言中書舍人陳傅良引帝裾請毋入因至屏後后叱曰此何地爾秀才欲斫頭邪傅良下殿慟哭后復使人問曰此何理也傅良曰子諫父不聽則號泣而隨之后益怒遂傳旨罷還宮其

後孝宗崩帝不能親執喪宰相趙汝愚謀內禪立寧宗
尊后曰太上皇后上尊號曰壽仁慶元六年崩年五十
六謚慈懿

黃貴妃淳熙末在德壽宮封和義郡夫人光宗為皇太
子傍無侍姬上皇以夫人賜之遂專寵即位拜貴妃紹
熙二年冬十一月為皇后李氏所殺帝聞而成疾又有
張貴妃亦舊侍東宮次婕妤符氏後出嫁于民間

寧宗恭淑韓皇后相州人其六世祖為忠獻王琦初后

與姊俱被選入宮后能順適兩宮意遂歸平陽郡邸封
新安郡夫人進崇國夫人王受禪冊夫人為皇后后父
同卿由知泰州陞揚州觀察使母莊氏封安國夫人慶
元六年崩謚恭淑同卿累遷慶遠軍節度使加太尉慶
元五年卒贈太師謚恭靖同卿季父侂胄自以有定策
功聲勢熏灼同卿每懼滿盈不敢干政時天下皆知侂
胄為后族不知同卿乃后父也同卿沒一年而后崩侂
胄竟敗人始服其善遠權勢云同卿子竑后兄也官至

承宣使

恭聖仁烈楊皇后少以姿容選入宮忘其姓氏或云會稽人慶元元年三月封平樂郡夫人三年四月進封婕妤好有楊次山者亦會稽人后自謂其兄也遂姓楊氏五年進婉儀六年進貴妃恭淑皇后崩中宮未有所屬貴妃與曹美人俱有寵韓侂冑見妃任權術而曹美人性柔順勸帝立曹而貴妃頗涉書史知古今性復機警帝竟立之次山客王夢龍知其謀密以告后后深銜之與

次山欲因事誅侂冑會侂冑議用兵中原俾皇子曦入
奏侂冑再啓兵端將不利於社稷帝不答后從旁贊之
甚力亦不答恐事洩俾次山擇廷臣可任者與共圖之
禮部侍郎史彌遠素與侂冑有隙遂欣然奉命參知政
事錢象祖嘗諫用兵貶信州彌遠乃先告之禮部尚書
衛湜著作郎王居安前右司郎官張鉉皆預其謀開禧
三年十一月三日侂冑方早朝彌遠密遣中軍統制夏
震伏兵六部橋側率健卒擁侂冑至玉津園槌殺之復

命彌遠象祖等俱赴延和殿以強侂冑聞帝不之信越三日帝猶謂其未死蓋是謀悉出中宮及次山等帝初不知也后既誅侂冑彌遠日益貴用事嘉定十四年帝以國嗣未定養宗室子貴和立為皇子賜名竑彌遠為丞相既信任於后遂專國政竑漸不能平初竑好琴彌遠買美人善琴者納之而私厚美人家令伺皇子動靜竑嬖之一日竑指輿地圖示美人曰此瓊崖州也他日必置史彌遠於此地美人以告彌遠竑又書字於几曰

彌遠當決配八千里竝左右皆彌遠腹心走白彌遠彌遠大懼陰蓄異志欲立他宗室子昀為皇子遂陰與昀通十七年閏八月丁酉帝大漸彌遠夜召昀入宮后尚未知也彌遠遣后兄子谷及石以廢立事白后后不可曰皇子先帝所立豈敢擅變是夜凡七往反后終不聽谷等乃拜泣曰內外軍民皆已歸心苟不立之禍變必生則楊氏無噍類矣后默然良久曰其人安在彌遠等召昀入后拊其背白汝今為吾子矣遂矯詔廢竝為濟

王立昀為皇子即帝位尊皇后曰皇太后同聽政寶慶二年十一月戊寅加尊號壽明紹定元年正月丙子復加慈睿四年正月后壽七十帝率百官朝慈明殿加尊號壽明仁福慈睿皇太后十二月辛巳后不豫詔禱祠天地宗廟社稷宮觀赦天下五年十二月壬午崩于慈明殿壽七十有一諡恭聖仁烈次山官至少保封永陽郡王次山二子谷封新安郡王石永寧郡王自有傳姪孫鎮尚理宗女周漢公主官至左領軍衛將軍駙馬都

統宗族鳳孫等皆任通顯云

理宗謝皇后諱道清天台人父渠伯祖深甫后生而鰥黑瞖一目渠伯早卒家產益破壞后嘗躬親汲澠初深甫為相有援立楊太后功太后德之理宗即位議擇中宮太后命選謝氏諸女后獨在室兄弟欲納入宮諸父擲伯不可曰即奉詔納女當厚奉資裝異時不過一老宮婢事奚益會元夕縣有鵲來巢燈山衆以為后妃之祥擲伯不能止乃供送后就道后旋病疹良已膚蛻瑩

白如玉醫又藥去目醫時賈涉女有殊色同在選中及入宮理宗意欲立賈太后曰謝女端重有福宜正中宮左右亦皆竊語曰不立真皇后乃立假皇后邪帝不能奪遂定立后初封通議郡夫人寶慶三年九月進貴妃十二月冊為皇后后既立賈貴妃專寵貴妃薨閭貴妃又以色進后處之裕如畧不介懷太后深賢之而帝禮遇益加焉開慶初大元兵渡江理宗議遷都平江慶元后諫不可恐搖動民心乃止理宗崩度宗立咸淳三年

尊為皇太后號壽和聖福進封三代父渠伯魏王祖深甫曾祖景之皆魯王宗族男女各進秩賜封賞賚有差度宗崩瀛國公即位尊為太皇太后太后年老且疾大臣屢請垂簾同聽政彊之乃許加封五代太后以兵興費繁痛自裁節汰慈元殿提舉以下官省汎索錢緡月萬平章賈似道兵潰陳宜中上疏請正其罪太后曰似道勤勞三朝豈宜以一旦罪而失遇大臣禮先削其官後乃寘法貶死京朝官聞難往往避匿遁去太后命揭

榜朝堂曰我國家三百年待士大夫不薄吾與嗣君遭家多難爾小大臣不能出一策以救時艱內則畔官離次外則委印棄城避難偷生尚何人為亦何以見先帝於地下乎天命未改國法尚存凡在官守者尚書省即與轉一資員國逃者御史覺察以聞德祐元年六月朔日食既太后削聖福以應天變丞相王爚老病陳宜中留夢炎庸懦無所長日坐朝堂相爭戾而張世傑兵敗於焦山宜中棄官去太后累召不至遺書宜中母使勉

之十月始還朝太后又親為書召夏貴等兵曰吾母子不足念獨不報先帝德乎貴等亦罕有至者是月大元兵破常州太后遣陸秀夫等請和不從宜中即率公卿請遷都太后不許宜中痛哭固請不得已從之明日當啓行而宜中倉卒失奏於是宮車已駕日且暮而宜中不至太后怒而止明年正月更命宜中使軍中約用臣禮宜中難之太后涕泣曰苟存社稷臣非所較也未幾大元兵薄臯亭山宜中宵遁文武百官亦潛相引去二

月辛丑大軍駐錢塘宋亡瀛國公與全后入朝太后以疾留杭是年八月至京師降封壽春郡夫人越七年終年七十四無子兄奕宗時封郡王姪堂兩浙鎮撫大使尚榮郡公主暨壘並節度使端平初頗干國政云

度宗全皇后會稽人理宗母慈憲夫人姪孫女也略涉書史幼從父昭孫知岳州開慶初秩滿歸道潭州時大元兵自羅鬼入破全衡永桂園潭州人見有神人衛城者已而潭獨不下逾年事平至臨安會忠王議納妃初

丁大全請選知臨安府顧嵩女已致聘矣大全敗嵩亦罷去臺臣論嵩大全黨宜別選名族以配太子臣僚遂言全氏侍其父昭孫往返江湖備嘗艱險其處富貴必能盡警戒相成之道理宗以母慈憲故乃詔后入宮問曰爾父昭孫昔在寶祐間沒于王事每念之令人可哀后對曰妾父可念淮湖之民尤可念也帝深異之語大臣曰全氏女言辭甚令宜配冢嫡以承祭祀景定二年十一月詔封永嘉郡夫人十二月冊為皇太子妃弟永

堅等補承信郎直秘閣度宗立咸淳三年正月冊為皇
后追贈三代賜家廟第宅弟清夫庭輝等一十五人各
轉一官五年三月后歸寧推恩姻族五十六人進一秩
咸平郡夫人全氏三十二人各特封有差后生子不育
次生瀛國公十年度宗崩瀛國公立冊為皇太后宋亡
從瀛國公入朝于燕京後為尼正智寺而終

楊淑妃初選入宮為美人咸淳三年進封淑妃推恩親
屬幼節等三十四人進秩有差生建國公昞宋亡昞走

溫州又走福州衆推為主冊妃為太后封弟昺衛王昺
修容俞氏所生也至元十四年大軍圍昱于海上明年
四月昱卒昺代立十六年春二月昺投海死妃聞之大
慟曰我間關忍死者正為趙氏祭祀尚有可望爾今天
命至此夫復何言遂赴海死其將張世傑葬之海濱

宋史卷二百四十三

宋史卷二百四十三考證

恭聖仁烈楊皇后傳少以姿容選入宮忘其姓氏或云

會稽人○

臣蒲封

按齊東野語后養母張於儀真長

蘆寺前僦居住僧善相知其女當貴假之資如杭入

慈福宮憲聖愛之茂陵至后所必目之后知其意因

以為賜

宋史卷二百四十三考證